



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 7

Rajasthan CM Gehlot-i District tasen 19 tentettsü metetdaksür

China Tir Xi Jinping-i taruba hopta Russia semdangtsü

VOL. XX NO. 155 (ADOK 155) DIMAPUR KÜPTOKNÜ (SATURDAY) METSÜREMI (MARCH) 18, 2023 ₹ 5.00

CPO-i ULB election agitsüba sentong magizüker

Kohima, March 17 (TYO) : Mokochung aser Kohima nung Municipal Council election magidaksütsü ta ali kiburtemi metetdaksüba sülen, ano Phek district nunga kasa ULB election ya tang lateta akaba Nagaland Municipal Act ya mereprangshi tashibo magidaksütsü ta Chakhesang Public Organisation (CPO)-i metetdaksüo.

Iba teletetba ya CPO den Chakhesang nungertongtibang lokti tentet ajak nungi lenirtem March 15 nü adenshia senden alidang lemtet ta parnok metetdaksü.

Tang Nagaland Municipal Act nung Naga nung sobaliba dak apet temelenshitsu

nüngdaka reprangtetbatem ya tan March 20 nungi amentsü aliba tatar senden nung yasa benoka jembir, kechisüdirsiaka iba Municipal ozüing yagi linük arla 371 A nung Naga nung nem temeten agüja aliba dak mekongshitsüsa melenshitsu ta CPO-isa metetdaksüo.

Tetsürtem nem menden balaka shiteta yutsüba onük ya meyipa reprangshitsüla aser asenok sobaliba dak apet benshitsu la parnokisa ashi.

Iba Nagaland Municipal Act ya Naga nung sobaliba dak apetsüsa memelenra, Chakhesang nungertem ULB election nung shilem magitsü ta CPO sangdong ajangasa metetdaksü.

March ita nung Treasuries aser banks meshibangtsü

Kohima, March 17 (TYO) : Government senotsü maparen ajak renema inyaktettsü atema tan March ita nung Bodbar aser Honibar anogotem ajak mapa inyakba anogotem alitsü, anungji

March 18, 22, 25 aser 29 anogotem nung State Treasuries aser bank-tem meshibangtsü ta tanü State Finance department sangdong ka ajanga metetdaksüo.

Tanü AHOds & HoDs senden amentsü

Kohima, March 17 (TYO) : March 18, 2023 nikongdang 1:00 ako nungi Secretariat Conference Hall, Kohima nung Department ajak nung tokolak purtem senden ka amentsü metetdaksüo.

Iba senden nung taoba senden nung lemtetbatem meyipa

reprangshitsu aser Kohima nung G20 mungdang alitsüba dak aketba maparen aser tatar senden alitsüba dak aketba mapatem indang nüngdak ken o benoka jembitsu, anungji züngsem ajak arua adentsüla ta metetdaksüo.

Assembly nung adentsü atema temelaba agütsütsü

Kohima, March 17 (TYO) : 14 buba Nagaland Legislative Assembly kümer mezüing tatar senden March 20 nungi 28 tashi alitsü aser iba sentong nung adentsü purtem asoshi temelaba "Car Pass aser Official Gallery Pass" agütsütsü atema tanü Nagaland Legislative Assembly sangdong ka ajanga metetdaksüo.

Item pass-temji March 18 aser 18 nü anepdang 10:30 ako nungi nikongdang 3:30 ako tashi nung yamai agütsütsü ta

metetdaksa lir : Ministers, Advisors aser AHOd purtemajak Special Secretary (Home), Civil Secretariat, Nagaland, Kohima nungi Car Passes aser Gallery Passes angutsü. MLAs, P.S/P.A-tem ajak Reception Counter Gate No-II, Nagaland Legislative Assembly Secretariat nungi Car passes angutsü. Ano, HoDs, IPR aser Media purtem ajak Reception Counter, Gate No-I, Nagaland Legislative Assembly Secretariat nungi car passes angutsü.

Red Cross Society Nagaland nung tongti zülur shim

Kohima, March 17(TYO) : Indian Red Cross Society Nagaland State Branch purtem senden ka lia parnok telok nung tongti zülur asütsü atema Wt. Alkale V. Khamo shimogo.

La ya kümsük küm 2023-2026

atema tongti zülur asütsü atema shimaser iba teletetbaji Nagaland angh aser Indian Red Cross Society Nagaland State Branch nung tir-ia mulung agizükogo ta tanü IRCSN sangdong ka ajanga metetdaksüo.

Northeast nung tzünglu aser rü tsüksü

Guwahati, March 17, 2023 (Agencies): Northeast nung March 17 nungi 21, 2023 tashi tzünglu arutsü, yipru aitsü aser mopung tashi agi aontsü imlar.

March 17 aser 21 tsüngda West Bengal nung rü alatsü aser March 21 nü West Assam o Tripura nunga ra alatsü.

March 18, 2023 nü Arunachal Pradesh, Assam, Meghalaya, Nagaland, Manipur aser Sikkim nung tzünglu arutsü ta IMD-i metetdaksü.

Kohima nung Municipal election alitsü renemer



Kohima, March 17 (TYO) : Tanü Rogonü Kohima Municipal Council nung Administrator aser Returning Officer, Wt. T. Lanusenla Longkumer-i Kohima Municipal Council kübok Ward

Nos.1, 2, 3, 4, 5, 6, 7, 8, 9, 10, 11, 12, 13, 14, 15, 16, 17, 18 aser 19 nung election agitsü sangdongogo aser item ward-tem nungi Ward Nos. 3, 6, 9, 12,

15 aser 18 tetsürtem atema shiteta yutsür ta metetdaksü.

Iba ULB election atema April 3 nungi 10, 2023 tashi nung anüngdang 11: 00 ako nungi

Nikongdang 3:00 ako tashi nung Nomination papers agütsütsü, anungji candidate mesüra proposer-i Kohima Municipal Council office, New Super Market Complex, Kohima

nungi nomination paper-ji agizüktettsü ta laisa metetdaksü.

Item nomination paperji April 12 nungi 13 tashi reprangtsü aser meyipa aginertem atema April 24 nikongdang 3:00 ako tashi mapang lapoktsütsü aser election agitsüsa süra May 16 anepdang 7:30 ako nungi nikongdang 3:30 ako tashi vote enoktsüba mapang alitsü ta laisa metetdaksüo.

Moatoshi-i nübortem dang pelaba metetdaksü

Dimapur, March 17 (TYO) : Tanü Rogonü yangi Dimapur nung election nung adokba asoshi Tsüngrem aser nisung nem tenüngsang agütsüba sentong nung jembidang, Dimapur-II Assembly Constituency nungi adoksang, Wb. Moatoshi Longkümeri nübortem pa nem anaben tashi yimsütsü maongka agütsüba atema pelaba metetdaksü.

Wb.Moatoshi Longkümer ya tan election nung NDPP telok nungi adok aser pa nem Labour Employment, Skill Development aser Excise department-tem nung advisor mapa inyaksü lemezükja lir.

Tanü SM College auditorium

nung tenüngsang agütsüba sentong nung jembidang, 'nübortem nüngdakba tongteta inyaksütsü asoshi kanga khuretsa bilemer, anungji nisung ajaki aremzüka mapa ajak nung yaritepdaksüner," ta Wb.Moatoshii metetdaksü. Mapang tatsüka tsüngda mapa tulukabo meinyaktettsü, anungji nübortem aremzüka atadaksüner pa paisa ashi.

Iba sentong temer oangbenertem paia Nagaland nung yi meyaglutsü aser mayoktsü nokdanga aliba indang ya Excise department nung Advisor asünungji koma bilemer ta asüngdang dang," iba ozüing ya amshidi süra shitak akanga

amshitsüla mesüra salaang tajungba, kechiyong iba jagi Nagaland government senpongi sen aitsü," ta pai langzü.

Tang ano Nagaland nung ULB election agitsüba maparen nung tetsütem nem menden balaka shiteta yutsüba indanga koma bilemer ta asüngdang dang, ' tetsürtem nem yimten nung shilem agitsü maongka agütsütsüla, iba sentongji menokdangtsüla," ta Dimapur-II nungi adokba MLA-isa ashi.

" Küm nung LADP sen lakh 80 shir aruba nungi akok tashi mepu aser kiyong ajak nung terenlok mapatem inyaksütsü merangtsü," ta paisa metetdaksü.

NDPP-BJP telongjemi Opposition malitsüba ken o melemtet

Kohima, March 17 (TYO) : Nagaland nung tan election agiba sülen takok angur yimten talok ajaki NDPP aser BJP na telongjemi aniba government nung adentsü asoshi teletetba ken o metetdaksüaka, ano tang tashi parnok shinga government nung manioki lir, anungji tatar senden nung opposition alitsü-malitsüba tango meshitetter.

14 buba Nagaland tatar senden kümer mezüing senden March 20 nungi amentsü sentong adoka lir, saka NDPP aser BJP teloki tatar senden nung opposition alitsü-malitsüba indangji kecha memetetdaksü lir. Tang tatar senden nung NDPP telok nungi tatar 25 aser BJP telok nungi tatar 12 adoka lir, anungji tangar teyari magiyonga

parnok 37 jagi ayongayonga government-bo kümogo aser mapatema lemsaogo.

Nagaland tatar senden nung opposition mali government aotsüba tatar tang mezüing masü saka tang yabo government junga kümteta maodangyongi opposition nung mener shinga mali akümba nguogo. Ajisüaka, tanga telok nungi government nung denertemji agizütsü asü magizüksüar BJP dak tuluka keta lir ta angazüker. Tawa Chief minister, Rio-ia Nagaland tatar senden nung opposition alitsü-malitsüba par telok kisung mulung masü BJP telok den angatettepa inyaksü ta shia liasü,

Nagaland tatar senden nung opposition malitsüba tatar nübortemibo magizüktetter,

kechiyong government inyakyim mita repranger shinga malitsü, anungji tatar senden nung opposition melira nübortem opposition teloki inyaksüba mapa inyaksüsa akümtsü ta lokti tentet lenirtem aikati jembir.

Iba osangbener den jembidang, NSF tir Wb.K.Tep-i Nagaland ajungtsü aser nübortem ajangzüktsü atema Nagaland tatar senden nung opposition kanga tashi itta alitsüla ta ashi. Nagaland tatar senden nung opposition malitsüba osangji tejashitsüka lir ta paisa shisem. Naga yimten tebilemtsü latettsü asoshiho Nagaland tatar senden nung opposition aliyonga maliyonga kasa dang asütsü ta NSF tirisa metetdaksü.

Directorate of IT&C ajanga Principal Secretary Vizo nem tenüngsang agütsü



Principal Secretary K D Vizo (achichi) ajanga March 17, 2023 nü Director, ITC, Er Tongtiliba aser Additional Director, Er Sabou Yashu nem pai züluba thesis agütsüba noksa nung angur.

Kohima, Metsüremi/March 17 (TYO): Principal Secretary to Government of Nagaland, K D Vizo-i Degree of Doctor of Philosophy (PhD) ngutetba atema Directorate of Information Technology & Communication, Nagaland ajanga March 17, 2023 nü tenüngsang agütsüba sentong ka agia liasü.

Vizo-i PhD ya "Role of Information Communication Technology and citizen centric services on socio-economic development in Nagaland" nung nguteta liasü.

Iba sentong nung jembidang pai züluba thesis yagi lanurtem talisa research aser technology

tsütsü mangdang arishitsü, koba Nagaland nung ano tasen lir, ta Vizo-i ashi.

Maongka aika aser peria lir aser tetsükdaktsü ajuruaka asenoki maneni temolung agüja inyaksü nungdaker, ta pai ashi.

Information technology ajanga alima melenshidaktsü aser Nagaland ya balaka masü aser tali ang renloka aotsü, ta Vizo-i ashi.

Kidang süang, mapa inyakba tesem, school, business, nübur indang service, socio economic development nunga süang, IT ya meimchir takum liru ajunga nung kongshir, ta pai ashi.

Anungji Nagaland nung aliba lanurtemi iba sector nung tali

azüngtsü aser research agütsüla, ta ayongzük.

PhD anguba ya konang ka amai lir aser ajemalushir, ta Vizo-i ashi aser IT Department nung ketdangsur aser staff temi yaritepba atema pelaba lemsatapa liasü.

Research agiba mapang loktiliba nung temelenshi bener arutsü atema hadir aser shisatsü jenti ngutetogo, ta pai ashi.

Principal Secretary ajanga pai züluba thesis ya copy ka Director IT&C, Er Tongtiliba Longkumer nem agüja liasü.

Iba sentong nung Additional Director, Er Sabou Yashu menden liasü aser Joint Director Asano Mor-i melepzüng o jembia liasü.

Nagaland nung Poshan Abhiyaan sentong agütsü

Dimapur, Metsüremi/March 17 (TYO): Poshan Abhiyaan ajanga mashisa aliba tetsürtem, nubentsüa aliba tetsürtem, teinlonglong tetsürtem aser arishi küm trok tekübok tanurtem takum nung temelenshi tajung lidaktsütsü atema inyaker.

Poshan Abhiyaan indang taginüba nükjidong tongtetsü atema kija aser lokti yimya melenshitsu ya kanga tongtipang lir, koba Mission Saksham Anganwadi aser Poshan 2.0 (Anganwadi Services, Scheme for Adolescent Girls aser POSHAN Abhiyaan den lirumedema inyakba integrated nutrition support programme ka lir) den külemi maneni inyaker.

Item nükjidong den bendenloksema Poshan Pakhwada ya stakeholder ajunga den lungjemer March-April mapang benjonger. Abhiyaan semzükba sülen linük nung Poshan Pakhwadas pezü tashi takok ngua agiogo, kong states/UTs aser convergent Ministries aser department tem nungi tejangraba tulu nung shilem agia arur. Tesüsaba Poshan Pakhwada 2022 nung tongtipang omen balala nung ajemdaker inyaksangshi crore asem jungnüa inyaka liasü.

United Nations General Assembly ajanga pangzüng ka renemba nung 2023 ya Internationla Year of Millets

sangdong, koba India ajanga Food and Agriculture Organisation dangi bena liasü.

Iba sentong nükjidong ya millets (jenjang-menjang) nungi temang nung teyari agütsüba aser tzü-mopung majungdaka züsentetsüba nübur nem angatetdaktsütsü lir aser Shee Anna mesüra Millets nungtugu kumdaktsütsü asoshi Ministry of Women & Child Development (MWCD) ajanga mera balala agir.

Millets ajanga temang nung teyari agütsüba nübur nem angatetdaktsütsü asoshi March-April 2023 nung Poshan Pakhwada ya tapet sapang ka ama züngshir.

Iba den külemi iba benjongmung mapang temolung agütsüba agr group nung tanur ajunga height & weight asadanga nung ranglokba Swasth Balak Spardha aser Saksham Anganwadis dak rangloker.

Tsünglanglen agüja aliba omen nung ajemdaker inyaksangshi sentong renema lir:

Theme I - Nutritional wellbeing atema Shree Anna/Millet temaba jenjangi ajungkettsüba.

Theme II - Swastha Balak Spardha benjongba.

Theme III - Saksham Anganwadis nungtugu kumdaktsüba.

Iba atema MoWCD indang guidelines kübok Poshan

Pakhwada 2023 benjongtsü atema Action Plan ka State Project Management Unit ajanga renema lir.

Poshan Pakhwada ya March 20, 2023 nü semzüktsü aser April 3, 2023 tashi benjongtsü.

Theme I - Nutritional wellbeing atema Millet dak sendakba nung millet recipes, cooking competition, millet achiba ajanga temang anema yutsüba awareness, tetsür mashisa, teinlonglong tetsür aser tanurtem atema millet ajanga temang nung teyari agütsüba nung rangloker nüburtem atema sentong ayongzükba.

Iba sentong nung Anganwadi Workers, ASHAs, SHGs, kinungbo aser kinungtsü tem shilem agütsü.

Theme II - Celebration of Swasth Balak Spardha benjong kübok nutritional education aser growth monitoring atema ki sema jajatsü, healthy baby shows tem alitsü, Anemia camp nung mashisa tetsürtem, nubentsür aser teinlonglong tetsürtem screening agütsü.

Theme III kübok Sassham Anganwadis mapang Anganwadi Center tem nung WASH/cleanliness drives alitsü aser teka shidokba atema seminar agütsütsü.

Poshan Pakhwada 2023 benjongmung ya April 3, 2023 nü tembangtsü aser iba anogo best performing grassroot level worker nem sempet agütsütsü.

Osang kaket adoker dang Form 1 agütsütsü metetdaktsü

Dimapur, Metsüremi/March 17 (TYO): Ministry of Information & Broadcasting, Office of the Registrar of Newspaper for India (RNI) nungi osang aruba ama, osang kaket adoker ajaki PRB Act nung mela aliba ama O/o RNI nem (Form 1) Declaration agütsütsü metetdaktsü.

Iba Form ya Press and Registration of Books Act (PRB ACT) 1867 nung aliba ama authenticated Declaration from DM/Collector/SDM/CMM/DCP/ Specified authority nung ajemdaker agütsütsüla.

RNI ajanga guidelines yanglushiogo aser Act kübok

shia aliba ama tang nungi tenzüka Office of the Registrar of Newspaper for India ajanga Authenticating Authority nungi indang-indanga yokba Declarations dang agizüktsü, ta ashi.

Authenticated original declaration (Form 1) ya Authenticating Authority ajanga indang-indanga April 1, 2023 nungi tenzüka The Press Registrar, O/o the Registrar of Newspaper for India, 9th Floor, Sookhna Bhawan, CGO Complex, Lodhi Road, New Delhi - 110003 dangi yoktsüla mesüra registration-rni@gov.in nung email asütsüla, ta sangdong ajanga ashi.

Gorkha Public Panchayat Kohima lokti senden ayonger

Dimapur, Metsüremi/March 17 (TYO): Gorkha Public Panchayat Kohima indang lokti senden Multi-Utility Hall, Chandmari, Kohima nung March 19, 2023 nikongdang 2:00 ako nungi amentsü, ta sangdong ka ajanga ashi.

Iba senden nung lokti ajungtsü

indang onük tem benoka jembitsü, anungji Kohima district nung aliba Gorkha nunger, Gorkha NGOs indang executives, clubs aser Jatiya Sansthas tem Kohima district alema orr alirtema arua adentsü ayongzük, ta sangdong ajangasa ashi.

Tetsür tanur dak tashiyim inyaker küm 20 tepuokdaki yok

Dimapur, March 17 (TYO) : Tetsür tanur suwar küm 18 majunga ka dak tashiyim agi mapa tamajung inyakba anema 8th NAP Naltoqua, Zunheboto nung soruchioker ka tenüng agi Nandu Lal Kumar POSCO Act nung ajemdaker obendanger Wb.Ajongba Imcheni aitsüogo aser pa nem temerenshi küm metsü tepuokdak ayutsü obendang agütsüogo.

Iba denji ano pa dangsa senchia sen Rs.20,000 achitsü obendang agütsü. Pai iba senchi senji magütsütetra ano tepuokdak küm ka talila ayutsü ta obendang agütsüba nung shia lir.

Iba aibelensang yagi pai raksatsür nemji temenok magütsütettsü, anungji District Legal Service Authority, Zunheboto ajanga anepalua

temenok agütsütsüla aser iba senji la anepalur nem la anepalutsü asoshi agütsütsüla ta obendangerisa metetdaktsü.

Kasa aibenlenba mapa ka nung, Dimapur nunga Fast Track Special Court-i nisung ka tenüng agi Izeerangbe Yalie nem temerenshi küm 20 tepuokdak ayutsü aser senchi sen Rs.10,000 agütsütsü obendangeri obendang agütsüogo. Pai senchi senji magütsütetra ano talila küm ka tepuodak ayutsü ta obendangerisa obendang agütsü. Yalie ya bank colony Dimapur nung alir ka liasü. Pa anema Childline ajanga 2021 küm July 9 nü FIR ka agütsüba nungi meteta pai par kinunger tetsür chanu tila ka dak mapa tamajung inyakba anema okadak ken o benoka liasü.

NCC-i Longleng nung career guidance workshop ayongzük

Dimapur, Metsüremi/March 17 (TYO): Yingli College, Longleng nung aliba 25 Naga Bn NCC ajanga March 17, 2023 nü 'Career Guidance Workshop' ka ayongzükka liasü.

Anogo tesadang ka aliba workshop nung Commissioned Officer ama Armed Forces nung adentsü atema eligibility, role aser tajanzük, pay and allowances amala indang jembia liasü.

Iba sentong nung Col CST Swamy, Commanding Officer, 25 Naga Bn NCC, Mokokchung ajanga audio-visual presentation agütsü aser College indang NCC cadets tem densema kaketshir dang Armed Forces nung dena Naga nunger asoshi tatishitsü asütsü ayongzükka liasü.

Pai Armed Forces nung adenba nungi tajanzük anguba indang lemsatpdang Free Training, küm nung anogo 80 leave anguba, pei aser kinunger atema medical facilities, canteen facilities amala agütsüba indang lemsatapa liasü.

Paisa NCC 'C' Certificate

Ajidang masü 'Agnipath' scheme kübok sepia ama shimba nung marks 20 talila agütsür, ta ashi.

Tejangrar candidate tem application process, written exam aser SSB Interview atema 25 Naga Bn NCC yariteptsü renema lir, ta metetdaktsü.

Kasa sentong nung Dr T Temsu Imti, Principal, Yingli College ajanga jembidang kaketshirtem dang iba maongka tajung amshia Armed Forces nung akum keta linük tenzüksü ayongzükka liasü.

College indang NCC Cadets temi college nung inyaksangshi ajaklen yakpang sür arur aser danga college nung azünger kaketshir asoshi nükrangdong ka ama tenzüker, ta pai ashi.

SUO Shetlong-i melepzüng o jembia sentong tembanga liasü.

GOVERNMENT OF NAGALAND
DIRECTORATE OF ECONOMICS AND STATISTICS
NAGALAND: KOHIMA

No.ES/1-12/VERF OF RBD/2014(Pt-I) Kohima, dated the March 2023.

NOTIFICATION

Pursuant to the Public Notice No.ES/RBD-8/1/2001 dated 23rd February 2023, issued by the Department of Economics & Statistics, it is to inform the general public that the Births & Deaths Certificates issued by Shri NIRANJAN CHETTRI S/o Lt. SANTA BAHADUR CHETTRI, stands cancelled and shall not be accepted as legal documents for proof of birth & death anywhere.

Therefore, all concerned holders of certificates bearing his signature (sample enclosed) are requested to report to the Registrar of Births & Deaths, Registration Unit in the Directorate of Economics & Statistics, Nagaland. This is for verification and re-issue of authentic certificates.

Enclosed : As stated.

FORM NO-5 (See Rule 8) GOVERNMENT OF NAGALAND DEPARTMENT OF ECONOMICS & STATISTICS BIRTH CERTIFICATE (Issued under Section 12A7) No. 91281 Birth and Deaths Act 1959 This is to certify that following information has been taken from the original record of birth which is the Register for (local Area) Kohima of Tahsil Kohima of District Kohima of State Nagaland Name Ramala Tamang Sex Female Date of Birth 04-02-1987 Place of Birth High School Area Kohima Name of Father R B Tamang Name of Mother Dyesolmang Tamang Registration No. 47237 Date of Registration 07-07-1987

Sd/- KEVILENO ANGAMI Commissioner & Secretary to the Govt. of Nagaland & Chief Registrar of Births & Deaths Nagaland, Kohima.

Tamil Nadu nung mamatzü shitoka lungkak ait



Chennai, March 17, 2023

(Agencies): Tamil Nadu sorkar den olemtep nung tamakok anguba sülen mamatzü ayimer aikati Hokolbarnü lungkak aitogo.

Mamatzü shishilembar telok aikati sorkar meyong cooperative Aavin nem agütsür. Aavin-i mamatzü alizükba sülen milk & milk products yokdoker aser mamatzü shishilembar temi jenjang atutsü atema asüngdang saka sorkari magizüker.

Brihostibarnü Tamil Nadu Milk Producers Welfare Association (TNMPWA) ketdangsürtemi Dairy Development Minister S. M.

Nasar den ajurutepe olemtep saka parnok obang meputepi dang senden tembang.

Iba senden amenba sülen Vazhapadi Rajendran-i aniba telok kati parnoki akhangba ama meinyak tashi Aavin dang mamatzü mayoktsü ta metetdaksü.

Iba nungji ajemdaker Hokolbarnü Erode nung milk producers-i lenmang nung mamatzü shitoka lungkak ait.

Minster Nasar-i producers' associations den senden amenba sülen osangbener den jembidang "parnoki lungkak aitba ajanga Aavin indang milk supply nung tetsükdaksü majurutsü" ta ashi.

Okadaki Manish Sisodia ED ket nung ayutsü melar

New Delhi, March 17, 2023

(Agencies): Delhi nung Rouse Avenue Court-i Hokolbarnü AAP lennir Manish Sisodia ano anogo pungunü Enforcement Directorate (ED) ket nung ayutsü temelaba agütsüogo.

Okadakisa Manish Sisodia-i par kibong asoshi cheque nung sign asütsü temelaba agütsü. Iba ya pa kinungtsü mozü ki nung temang anepaludang endokba Rs 40,000 aser Rs 45,000 lir.

Taoba Deputy Delhi CM Sisodia ya Delhi excise policy ken o dak sendakba nung ED-i pua lir.

Sisodia ya Tihar Jail nung lia Enforcement Directorate (ED) keti ao. February 26, 2023 nü CBI-i Sisodia apu aser pa March 6 tashi anogo 14 nü tepuokdak ayutsü agütsü.

National Capital Territory of Delhi (GNCTD) indang excise policy yangluba aser mapa inyakba nung tim masüba aliba dak sendakba nung Sisodi apu. Delhi nung Rouse Avenue court-i pa March 20, 2023 tashi ED ket nung ayutsü temelaba agütsü.

ED-i iba ken o atema Hyderabad nung shishilembar Arun Ramchandra Pillai puogo. Parnokisa Bharatiya

Rashtriya Samiti (BRS) MLC aser Telangana Chief Minister K Chandrashekhara Rao'er K Kavitha dang asüngdangyaogo.

2021 kum Delta Covid-19 wara alidang Chief Minister Arvind Kejriwal-i aniba Delhi Cabinet ajanga excise policy agizüka liasü.

Ajisüaka, CBI-i 2021-22 excise policy nung ochimashi lir ta ser ken o ka benoka liasü. Iba policy ya AAP sorkari meyipa agi.

CBI-i iba excise policy atema nisung 15 dak tai tongloktsü aser parnok rongnung Sisodia dena lir.

Rajasthan CM Gehlot-i District tasen 19 tentettsü metetdaksür

Jaipur, March 17, 2023

(Agencies): Hokolbarnü Rajasthan Chief Minister Ashok Gehlot-i district tasen 19 aser division tasen 3 tentettsü lemtetba osang metetdaksü.

Chief Minister Gehlot-i state assembly nung iba osang lemsatop. Rajasthan nung district tasenn 19 densema district ajak agi 50 akümtsü, ta pai ashi.

Rajasthan nung assembly election agitsü jakdang Gehlot-i iba osang metetdaksüogo.

"State nung district tasen kar tentettsü atema onok nem takhangbatem agütsüogo. Onok item takhangba atema

high-level committee ka tentet aser parnok nungi tatembang osang nguogo. State nung district tasentem tentettsü ni metetdaksür" ta CM Gehlot-i assembly nung metetdaksü.

CM Gehlot-isa irrigation efficiency aser canals & dams nung tzü tamagitsü nung endokba noktangsü indang mapatong balala inyaktsü atema Rs 37 crore agizükogo.

Banswara district kübok Rs 10 crore endoka Kagdi dam yanglushitsü aser Gajadharpura sewage treatment plant nungi Kalakh dam tashi Rs 11.73 crore endoka canal ka yanglutsü ta Rajasthan sorkari

metetdaksü. Ano Sawaimadhopur district nung Mora Sagar dam nungi canal ka Rs 15.03 crore endoka yanglutsü ta parnokisa ashi.

2022-23 Budget nung CM Gehlot-i dams aser canals yanglushitsü atema Rs 800 crore endoka mapatongtem inyaktsü lemezüka lir. Iba nungi Rs 611.95 crore indang maparen mulunga agizükogo. Rajasthan sorkarisa Rs 362.13 crore endoka Udaipur district kübok yimtsüng 367 nem tzü tajemtsü agütsütsü ta assembly nung metetdaksü.

Gehlot-i 2023-24 Budget nung ashiba ama iba senotsü ya agizük.

Mamata & Akhilesh nati Congress medeni Front tasen ka tentettsü

Kolkata, March 17, 2023

(Agencies): Centre nung opposition part tongtipang asemi Congress aser BJP naprong medeni front tasen ka tentettsü mulungtepogo.

Hokolbarnü Samajwadi Party tanishir Akhilesh Yadav-i Trinamool Congress tanishir Mamata Banerjee den ajurutepeba sülen iba ya lemtet.

West Bengal Chief Minister Banerjee-isa taruba hopta Odisha Chief Minister Naveen Patnaik den ajurutepe. Patnaik ya Biju Janata Dal tanishisang lir.

Congress MP Rahul Gandhi ya opposition party tem longjemba telok nung tongti lennir ka lir ta BJP-i ashiba anema tanga teloktem longjemer.

Indian Parliament nung opposition lennirtem indang microphones shibangsür ta tawa tu Rahul-i London nung jemi aser iba atema BJP-i pa nem tatok meshidaksünür.

BJP-i Gandhi tenüng amshia parnok dak tenük yoka mapa inyaker ta opposition party temi temulung melemi bilemer.

"Rahul Gandhi-i bendanglen iba onük jemi aser pai tatok memeshi tashi BJP-i Parliament mapa meinyakdaksütsü. Iba tetezü ya parnoki Congress amshia Parliament shibanga yunür. BJP-i Rahul Gandhi ya opposition indang tejak südaksür. 2024 election atema prime ministerial face

lemtettsü nungdak madoker" ta Trinamool Congress MP Sudip Bandyopadhyay-i ashi.

Congress ya opposition nung tanishir ta asübaaji tiyazü lir ta Bandyopadhyay-isa ashi.

"Chief Minister Mamata Banerjee-i March 23 nü Naveen Patnaik den ajuruteptsü. Onoki BJP aser Congress aser tanga opposition party tem den kasa tepila ayutsü atema jembitsü. Iba ya third front ta ashir masü saka opposition party temi BJP den tokteptsü tashi lir" ta paisa metetdaksü.

Akhilesh Yadav-ia parnoki Congress aser BJP den kasa tepila yunür ta shiogo.

"Bengal nung onok Mamata Didi den lir. Tang onoki BJP aser Congress den kasa tepila yunür" ta Yadav-i osangbener dang ashi.

'BJP vaccine' agirtemi CBI, ED mesüra I-T tsüba mebilemer ta paisa shisem.

Taoba opposition party lennirtem anema central investigation agencies-i bushisüngdanga aru saka parnok BJP nung adenba sülen ken o tem agienba indang Yadav-i ashi.

Central Bureau of Investigation aser Enforcement Directorate ajanga opposition party lennir aika nem timtem agütsür. Tawa tu parnoki Aam Aadmi Party lennir Manish Sisodia aser Rashtriya Janata Dal lennir Lalu Yadav o par kibong anema ken o benoka bushisüngdang.



TIR YIMYIM

YIMOBILEM (EDITORIAL)

DIMAPUR

KÜPTOKNÜ,

METSÜREMI 18, 2023

Ali kibur o government na

Yimten ka akümtsü atema nüngdak tulutiba anaji ka ali aser tangabaji nütsüng asütsü. Ali melira nütsüng aliyonga itemji talidak makatsü aser ali aliyonga nütsüng melira alijia tagidak makatsü. Kasaji ali maka ser nütsüngtemi government ka mekümtettsü aser ali makaba governmentji mapa makatsü. Iba timtemji tang Nagaland nung municipal aser town council election dak aketba maparen nung Nagaland government-i ajuruba timtem ya asütsü. Atangji, nütsüng nübortemi yimsüsürtem shimteta government-bo kümogo saka government-ji alima yimten asünungji ali nung dang inyaksü saka Nagaland nung government-ji ali kiburtem masü, anungji Nagaland government kübok alima nung ULB election magitettsüsa akümer. Iba ama tensa tia ka yagi Naga nungertem ya India temzüng kübok lia Nagaland government o Naga nunger ali kiburtem na tsüngda tangatettep nung Nagaland renloka aotsü atema inyakyim balaka nüngdakba ka sayur. Aji oda, tang ama Nagaland nung Supreme court ajanga ozüng agütsüba dena mapa küma meinyaktettsüsa akümba ya Supreme court nung obendangertemia ano khen meyipa reprangshitsüsa adoktsü. Nagaland state yabo yimten nüchiso angutsüba melen agütsüba asünungji, temzüng balaka maliyonga India temzüng kübok arla 371(A) nung Naga nunger ali kiburtem nem ali madak temeten ajunga agüja lir, anungji ali kiburtem dang masüngdangi government-i ali nung kecha inyaksü makoker. Ibaji dang masü saka center nung tatartemi tatar senden nung Nagaland nung Naga nunger likalilem aser sobaliba dak kongshitsüsa kechisa lemtetdir, itemji aruagi Nagaland tatar senden nung mulunga agizük nung dang, mapa küma inyaktettsü ta linük temzüng arla 371(A) nung jangjajangjaa shia lir. Anungji, parliament nung temzüng ozüng tasen latetba asütsüsa akok mesüra tejen yanglushiba ka dang asütsüsa akok, itemji Nagaland Legislative Assembly nung magizüktetra, Nagaland nung item temzüng ozüngji mapa küma mamshitetsü. Iba tashiji asenok nem tashi agüja lir ser nung, asenoki asen agitsüsa temzüng ozüng meyipa mamshitetba ajanga asen meyong totzü dena agiteta mamshiteter. Tanü Nagaland nung ULB election agitsüba ya parliament nung linük ajaklen kasa ozüng amshia agitsü renemba telemtetba ka lir aser iba kasa telemtetba nung ajemdaker supreme court-ia Nagaland nung ULB election agitsü asoshi anogo latetja lir. Atangji, ULB election ya Village council mesüra VDB election masü, anungji yimtak yimtsüng nung akhidang nungi amshia aruba yimten sobaliba inyakyim dak mekongshir, ibaibo urban area nung agitsüba sentong ka dang lir, anungji nübortemi nokdangtsüba kecha kuli mali aser nüngdak madoker ta government nung alirtemi jembir. Aji shitak, anungji ULB election ya agitsüla saka government li nung agitsüla. Tebilemdangtsüba tesemji aji lir. Atangji, Municipal aser Town council asünungji item ajakji urban (town) area nung alir, anungji putu menden yimsüsüba arla kübok masü, ajisüaka tebilemstüji urban area nung akaba alijibo yimtaklirtem meyong lir aser ULB election magitetba tebilemstü onük tulubaka ali dak sendakba onük lir. Aji oda, urban area nung akaba ali ya urban area nung alirtem meyonga masü aser government meyonga masü, anungji ULB election agiba agi Naga nunger yimtaklirtem dak mekongshir ta masü. Tanabuba nung, asenok aikati Municipal aser Town council alidak tesemtem nung terenlok mapa ajak ali aser kilen saru agi inyaksüla amato jembir. Ajisüaka, ULB election agiyonga municipal aser town council area nung lenmang, light aser tzü ama nüngdak tulutembo telidak purtem dang nungi ali aser kilen saruba saru agibo meinyaktettsü. Item saru jagibo anarongdena yimti yimdongang merüka topur junga yutettsü. Ajisüaka, municipal aser town council ajanga nübortem asoshi terenlok mapatem inyaksütsüba sarujibo shishilembaba aser kechisarina yangluba factory-tem nungi alimelen agiba aser government nungi aruba teyaritem agidang inyaktettsü. Iba tangatetba nung ULB akümtsüba ya nübortem dang nungi saru sarua terenlok mapa inyaksü amai tebilema mebilemstüla aser ozünga meyanglutsüla. Atangji, saru medeni yimten mapa meinyaktettsü, iba jagi yimtak yimtsüng nunga kibong shia saru molok atoker. Kasaji town nung alirtema ULB saru alitsü. Atangji, saruji government nung alir achitsüba masü saka saru jagi ali kibur aser telidakertem nüngdak inyaksütsü. Iba atemajibo government o ali kiburtem na tsüngda tangatettep kati melamelaa arutettsüsa nisungi nisung den jembitsüla.

OLEMSABANG

Yimsüsüba Mendenji Tsüngremi shimtetba aser Temeshi lir

L. Kika Pongener.

"Aser kechi bangdak lir aji Tsüngremi shimtetba" (Rom-13:1.b). "Kechiyong chuba mendenji Temeshiba agi küma lir" (A.Shin-16:12.b). Asenoki tang agüja aliba laishiba tekong ana nungji yimsüsüba menden bangdakji Tsüngremi shimtetba aser Temeshi-a ta jangja-jangja shia angur. Anungji bangdakji Tsüngremi shimtetba aser Temeshi sura, iba bangdak menden nung amenertem jagi kanga kümdanga Tsüngrem tsüngken tsüba yimsü asütsüla, kechiyong iba chuba menden nung mener yimsü asütsüba pa/la sasa mennuba agi amenerba masü, saka Tsüngremi nüburtem mulongjang nung jembir, aser nüburtemi meyongnem agüja shimteter yimsü asütsü tashi agütsür mendaktsür ta angatettsüla. Tsüngremi Mosa Israelpurtem Ijip lima alar tia nungi anitettsü asoshi pa nem iba lenitsüba mapa nungloktsütsü asoshi pa Horeb tenem nung san nuka lia sungsembok tila ka nung milak jangrua pa den jembir. Iba mapang Tsüngremi Mosa tang tongtipang o ka ashibaji, "Yangi anasa taru ne tetsüng nungi tamasa tsüngsem semzükang; kechiaser kechi ali nung na nokdaker aji Temeshi lir" (Anitet-3:5). Yimsüsürtem asoshi tekümdangtsü o-ji ibaji lir....Na amenba yimsüsüba menden aser ne nem lenitsü nungloktsüba mapa, iba bangdakji Temeshi lir aser iba mendenji Tsüngremi meshiteta ayuba menden lir. Anungji na iba Temeshi bangdak menden nungji mener yimsü asütsü asoshi Tsüngremi Mosa tang ashiba ama tamasa...Ne dak keta aliba ochi mashiba, tila mekümtetba, asüküm, mezümeküm, nuktapangda, japojar, nübur dang memeimba aser Tsüngrem aküm metsübuba, itum jakla yimya tamajungtem ajakji semzüka intoktsüla, kechiaser kechi bangdak menden nung na mener yimsü asütsüba lir, iba bangdakji temeshi menden lir aser aji Tsüngremi shimtetba ta kanga junga angateter dang yimsü asütsü tenzüktsüla. Babylon yimli nung Nebukadnezzar chubai pa amenba chuba mendenji pa sasa angu ama kanga mezümeküma, ngasangadema aser asüküma ulua bilem. Anungji Tsüngremi pa iba chuba menden nungi aritok aser nisung rongnung-ia aritok aser arem moapu nung Nashi ama rem mejaka lidaktsü. "O chuba Nebukadnezzar, ya ne tang ashir, ne tang nungi yimli pilaogo, aser na nisung rongnungi aritoktsü, ne talidak moapu shiruru rongnung alitsü, Nashi pongchi ama na kangshia rem chidaktsütsü. Kechiaser miimchir yimli madak tematibai yimsü asür, aser aji pai mulunger nem agütsür, ta nai memetet tashi mapang tenetben suidaktsütsü" (Dan - 4:31). Atangji, Nebukadnezzar chubai chuba yimlijji pa sasa angu ama bilema asüküma, mezümeküma, Tsüngrem aküm metsübui yimsü asü, anungji pa chuba menden nungi agiena-adok aser nisung rongnungi aritoker shiruru ama arem moapu nung rem chidaktsü.

Naga nunger madak yimsüsütsü shimteter lennir tajungtem.... Nebukadnezzar chubai bilemba ama yimsüsür kari danga asüküma, mezümeküma, chuba menden nung amenbaji asen sasa angu ama bilema ali asü...??? Rongsen dak temulung lema ali asü ? Nutsüng nübu dak temulung lema ali asü ? Tashitemetet dak temulung ulur asü ? Nuktapangda, japojar, yi, temesepba chiyungtsü nem anisadaksür asü ? Alima terenlok nungdem nung agütsüba rongsen, asen nüja meyong amai bilema, ki-o-jen yangludentsü, kimong-lumong alidentsü, semchi-semnur tashi ayung-ayunga alitsü asoshi Bank nung sen rizüngdentsü aser kimang-sosem ajunga takar akümtsü tebilemba/nukjidong ali asü ? Oh...Yimsüsür tajungtem...Kari danga yamaji bilema lira iba tebilembajibo melenshinung kanga ajungtsü. Nebukadnezzar chuba ama na chuba menden nungi Tsüngremi anizüktsü, na chuba menden nung mementettsüsa kümdaktsütsü Tsüngrem dak tashi ain lir-ko. Asen takaba rongsen ajak tangar kar keti aotsü, asen jala-jabasotem aseni magishitsü aser senmangar-a malitsüsa kümdaktsütsü Tsüngrem dak tashi ain lir-ko. Tsüngrem o-i ashir, "Saka tamajunger linuk nungjagi leptoktsü; Aser ashikülaker tera nungi atsütoktsü" (A.Shin-2:22). Kodang tera nungi atsütoktsü ta sudir...Chirnur aser semchi-semnur dena leptoktsü...anungji senmanger-a malitsü. "Nisung tajungi pei semchi-semnur nem senmangtsü toktsür ; Saka temenenpur rongsenji temeshipur asoshi rizünger" (A.Shin-13:22). Tim masüba lenmang nungi bendenba rongsenji tangar belemseta meinyaker kar atema rizüngtsür asütsü. "Tamajung agi ajangzükba rongsenji kecha tajangzük mali" (A.Shin-10:2). "Tiyazü temeli agi anguba rongsenji meyipzua alungba tangola; Shirnoki itemji bushir parnoki tasüba bushir" (A.Shin-21:6). Tiyazü Project & tiyazü Bill nungi tajangzük anguba rongsenji meyipzua alungba tangola ka dang mesuka alitsü. Kong/kolen endok'ar memeteti tazüngla/amajok mapa kar nung dang endoktsü. "Takar akümtsü temerang; aji nokdangtsüsa na shisa kaang. Nai idakji tenuk yokdang, aji oadoker; Kechiyong aoksa rongsen dak tashikang tener Orija ama anungleni yima oadoker" (A.Shin-23:4-5).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kentener Sanam Puri-i Dimapur nung tzüsenogo



SANAM PURI BAPTISM IN LQTHA
BAPTIST CHURCH DIMAPUR
NAGALAND

Dimapur, March 16, 2023
(Agencies): India nung nungtugu kentener telok 'Sanam' nung kentener Sanam Puri-i Brihostibarnü Nagaland kübok Lotha Baptist Church, Dimapur nung tzüsenogo.

Sanam Puri-i Kohima nungi Zuchobeni Tungoe den ani asüngtepogo aser yashi

Khristan züngsem ka aküm. Zuchobeni ya kaketshir aser kentener ka lir aser lai kentenba wadang nung takok aika nguogo.

La ya Kids for Fame 2011 takok angur, Miss Dimapur 2019, The Stage season 3 nung Top 25 contestant aser YouTube nung nungtugu

kentener ka lir.

Zuchobeni-i Little Flower Higher Secondary School nung azüing aser iba sülen Bangalore nung engineering azüingi ao saka la tejangraba balaka asüba agi züngtor toktsü.

Lai Mumbai nung Mass Media azüing aser tang Bachelors azünger.

TN nung VHP lennir kati Khristan putir ka amokmeren



Muthuvel

New Delhi, March 16, 2023
(Agencies): Tamil Nadu nung Vishwa Hindu Parishad lennir kati Ariyalur district nung parish putir ka dang nungi tashiyim agi sen meshia agi.

VHP lennirji Muthuvel lir aser pai Our Lady of Lourdes nung putir Dominic Savio dang

Rs 25 lakh meshi. Senji magütsüra Savio-i school tanurtem nem timtem agütsür ta osang prokshitsü ta Muthuvel-i amokmeren.

Iba atema Savio-i police tsüngda FIR ka benok.

Tamil Nadu nung school tanur tetsür ka sosetba nung

Muthuvel-i politics mapa inyaker. La züngba school-i la Khristan yimsü agi meyipdaksütsü merangba atema la soset ta pai tiyazü otsü purar prokshi.

"Ita 6 tejakdang Vinodh ta ser nisung ka den pa den ajurutep aser pa ket nung Savio-i Muthuvel den jembiba indang record ka lir ta ashi" ta Savio-i police dang ashi.

"Recording nungji Muthuvel-i Thanjavur nung kaketshir ka sosetba aser Savio-i kaketshirtem nem timtem agütsüba anema campaign ka tenzütsü indang shia lir" ta TNM ajanga metetdaksü.

Tamil Nadu Minorities Commission chairman Peter Alphonse-i iba mapa ya tang mezüing inyaker masü ta shiogo.

"iba ya VHP indang tasa ka lir aser yamai inyaker. School tem nungi dang masü saka tangar dang nungia parnoki teti tashiyim agi sen meshir. Police-i jungjunga bushisüngdang asütsüla" ta Alphonse-isa ashi.

Mozambique nung American missionary pilot aser nisung 2 chiokogo

North Carolina, March 17, 2023
(Agencies): American missionary pilot aser nisung ana ita pezü tema Mozambique nung tepuokdak yur chiokogo. Parnoki telungpurtem yari ta temulung melemba agi apu.

Ryan Koher aser South Africa nung nisung ana- W.J. du Plessis aser Eric Dry na chiokogo ta U.S nung amenoka aliba ministry Mission Aviation Fellowship (MAF)-i metetdaksü.

Koher tepuokdak nungi chiokba sülen junga dang lir aser pa kinungtsü Annabel aser jabaso ana den aiben jembioogo ta MAF otongdar kati ashi.

Par asemprong Mozambique nung dang amongtsüsa akümer aser ken o maneni angadangdar.

Mozambique nung okadak dang iba lemtet atema kanga pelar. Onok indang legal counsel dang nungi maneni inyaka aotsü lenmang bushitepdar, ta otongdarisa ashi.

Ryan aser par kibong atema sarasademsür ajak dang MAF-US-i pelar. Ryan dak tai kecha metongloksüi chioktsü atema maneni sarasademdaksünür, ta paisa metetdaksü.

Koher aser MAF volunteers ana ya November 2022 nung apu. Parnoki Mozambique kübok Cabo

Delgado nung orphanage ka atema vitamins aser tanga supplies enoka lia apu.

2017 küm nungi Islamic State den tesentaktep aliba telungpur telok kati yimtsüing, tenla ka aser mosques aika atsünga agiogo aser lendong balala nung nisung noklang aika süogo.

Tesüiba küm 5 tsüngda sepaitem aser telungpurtem tsüngda raratepba ajanga Cabo Delgado nung nisung million 1 shi kati pei pei yimtsüing toktsür jena ogo.

2014 nungi Ambassador Aviation den yaritepa MAF-i orphanage balala dangi supplies bener yokogo.

ANOGO ABEN TSÜNGREM DEN

Tekülemdak Tassen Ka

T.Ken 74:1-11

Babylon nungeri yimti aser tekülemdak raksatsübaji Yihuda nunger asoshi timtem liasü. Asaphi züluba nung kecha tesüngmangtsü mali, "Tsüngrem, nai kechiba ni teti endok? Kechiba ne chiyimtak san anema nai ain adoker?" (t.1). Nüburi temenen inyakba agi ya atalok ta bilemtetang. Parnok yimti tulu liasü. Parnok meyong tebur tajung tekülemdak liasü. Tebilemstüji parnoki yimti aser tekülem ki dak temulung alem, saka parnoki Kibuba dang tashi manga. Parnok temenen, tekülemdakji menentsü. Parnoki iba rakzükraktemer ki kümdaktsü (Yr. 7:11). Tsüngremi ibaji memelatsü, anungji pai Babylon nunger dang aji raksatsütsü mela. T.Ken 74 nung Asaph temulung raksaba jungkai adok.

Tanüa tsükchirtemi Tsüngremer mapa raksatsür. "Parnok süngdong nunger dak nok yoktsü merangba nisungtem ama lir" (t.5). Tsüngremer nisungi kechi inyaktsü akok? Asaphi Tsüngremer asoshi kechi ashi reprangang. Asenok pa san chiyimtak chiyimertem lir (t.1). Pa Sannüker Tajung, aser santem asoshi pai pa taküm agütsü. Babylon nunger noktangtsü san kechi nok-o-nü aka? Yisu, Sannüker.

Ano asenok Tsüngremer telok. "Lipok nungi nai alizükba telok, koba nai ne senmangtsü kin asoshi alangzükogo, aji bilemtettang" (t.2). Asenok taliba aser alangzükba purtem lir. "Zion tenem kechi nung na ali aji bilemtettang" (t.2). Tsüngrem asenok den lir. Yirusalem aser tekülem ki raksaogo, saka Pa terezüngdak tuluba lar. Yisu alimai aru aser

Tsüngrem sentsüwangshi jungkai adoktsü. Tang tassenba ki, pei Arogo aser ibaji kodanga meraksatsü.

Tsüngrem ne mulung alemdak. Nai Pa dak temulung lemra, nai Pa dang tashi anganütsü. Temelen alimai agütsüba nung temulung malemstü kümdangang. Satani pai akokba tashi inyaktsü. Kibuba dak tamang yuang aser Pai kodanga tamakok maludaktsütsü ta pelaa liang.



Khyber Pakhtunkhwa province kübok Bannu nung Pakistan Bureau of Statistics ketdangsür kati mezüngbuba door-to-door digital national census agiba angur. Ajisüaka census maparen ya Pakistan nung nübo agi tangar memenepba Khristantemi pelaa magizüker kechiyong tesüiba küm 20 tsüngda national census nung Khristantem aika mezüngoki aruogo. Sorkar record ajanga 2017 Khristan nütsüing yongsük ajema akümba dang sayur. 2017 national census ajanga Pakistan nung Khristan million 2.6 dang aliba shia lir aser iba ya nütsüing yongsük million 207 aliba nung 1.27% dang lir, saka Arogo lennirtemibo 2017 census nung Khristan nütsüing aika züngdokogo ta ashir.

China Tir Xi Jinping-i taruba hopta Russia semdangtsü

Moscow, Metsüremi/March 17 (Agencies): Tir Vladimir Putin-i jaokba ama taruba hopta China Tir Xi Jinping-i Russia semdangtsü, ta Kremlin-i Hokulbarnü ashi.

Beijing-i Ukraine nung yimjung ken o jembitsü molunga aliba mapang ka nung Hombarnü nungi tenzüka ananü Xi-i Russia semdangtsü, saka yimtenren tsütsü China-i Russia bukuma nokdakba ajanga anüolen linük temi temolung malemer.

"Senden amenba mapang Russia aser China tsüngta tesendaktep tajungba aser tongtipang maparen nung amalitep atema jembitsü," ta Kremlin-i ashi.

"Iba mapang linük ana tsüngta tongtipang document aika nung meyongnem agütsüteptsü," ta ashi.

Russia-i Ukraine amaktsü hopta ishika lia Putin-i Beijing nung 2022 küm February ita Winter Olympics tenzükdang

semdanga linük ana tsüngta tatem maka tesendaktep alitsü zülutepa liasü.

Linük ana yagi maneni tesendaktep nung tashi itshitsü jembia arur. Ukraine amakba sülen linük ana tsüngta shishilempaba tali kumogo aser Russia indang totzü timtiba aliba linükji Russia ya lir, koba Moscow atema revenue sources tongtipang lir.

Saka tawa China-i Russia aser Ukraine tetsüngtai ia ken o jembitsü meranga arur.

Russia-i Ukraine amak tenzüker küm ka ajungba anogo, February 24 nü China-i rara indang 12-point position paper ka saya aser yangji linük ana tsüngta yimjung alitsü aser jembishinü akatsü shia lir.

Hopta tetenzüklen Beijing-ia Black Sea nung Russia aser Ukraine tsüngta jang-o-tzü tsütsü tezüngzüktep ka yanglutsü aliba nung tetsüngtai aitsü molunga aliba lemsatepa liasü.

Aser Brestostibarnü Ukraine indang foreign minister den phone ajanga jembidang China foreign minister-i mazüokteti küm ka dak tema raraba indang bilemetsüba lemsatep aser Moscow den yimtenren tsütsü tangatetep kati arutsü asoshi jembitsü ajungshia liasü.

China-i teti Ukraine ken o nung tangatetba aser nükjiding kasa lir aser yimjung atema aser angateteptsü atema temolung agüja inyaker, ta Qin Gang-i Dmytro Kuleba dang shia liasü.

Mapang tatsüka lir Kuleba-i tweet ka nung Qin tena litsü-lika asoshi tangatetba lemsatepa liasü, ta ashi.

"Tashiyim amshia amakba atema ni Ukraine Tir Volodymyr Zelenskyy asoshi Peace Formula kota tongtipang aji angateter aser Ukraine nung yimjung lidaktsütsü asoshi bilemetsü," ta Kuleba-i zülutsü, shibai kasa anogo US Secretary of State Antony Blinken den jembia liasü.

North Korea-i ICBM tendangba jangjatsüogo

Seoul, Metsüremi/March 17 (Agencies): North Korea-i intercontinental ballistic missile khadokba jangjatsüogo aser iba ya Hwasong-17 lir ta ashi, koba dang parnokki "monster missile" ta ajar.

Nokdanga aliba missile tendangba ya South Korea aser Japan-i Brestostibarnü putet, koba Japan Ato Kilonser Fumio Kishida den senden amentsü asoshi South Korea Tir Yook Suk-yeol Tokyo-i aotsü ghonda ishika lia atalok.

Iba ya North Korea-i nok-nü balala tendanga aruba rongnung tesüsaba alitsü, koba United States aser South Korea lungjemer joint military exercise - Freedom Shield - Hombarnü tenzüka mapang ataloker aser Pyongyang-i iba inyakyim ya par linük amaktsü asoshi renemshiba ka ama züngshir.

ICBM tendangba Hokulbarnü jangjatsüba mapang North Korea indang state media ajanga ashiba agi, iba ya telangzüba tesashi agütsüsü asoshi sayutsü tebilemba nung inyak aser rara mesüa military drills agiba nung telangzüba lir ta ashi.

Pyongyang-i ashiba agi missile ya anüngleni kilometre 6,000 (mile 3,700) atu aser meta kilometre 1,000 (mile 620) shi orr East Sea of Korea (Sea of Japan ta ajar) anasa renema akaba tesem nung mezüngmezünga tsük.

Iba osang den külemi state media nung noksa lemsatepba nung North Korea lenir Kim Jong Un aser par jala nati iba missile tendangba repranga liasü aser noksa kar anünglen nungi tangokba liasü, koba

missile nung camera inoker tangokba amai lir.

"Tongtipang nok-nü tendangba ya Korean peninsula nung tsükchir temi metetsümonga tensa tamajungba kumdaktsüba asoshi tekumdangtsü ka lir," ta state news agency KCNA ajanga ashi.

North Korea indang military modernisation campaign asendenshi tenzüker 2022 küm nok-nü aika tendangba ajanga mitkar aser nuclear tsütsü tarendaktsü tensa ajura alidang Seoul aser Washington lungjemer drills ya agia liasü.

Tan hopta Pyongyang-i submarine ka nungi short-range ballistic missiles aser cruise missiles tem tendanga liasü.

US aser South Korea nati March 20 nungi tenzüka Ssangyong large scale amphibious landing exercises

tenzüksü aser yangji 40 British Marines temia shilem agitsü, ta Hokulbarnü sangdong. Freedom Shield ama North Korean denuclearisation nung terenlok lidaktsütsü merangba nung shilem ka ama amphibious exercise ya 2018 küm nungi thina arua liasü.

"Iba training ya ajanga South Korea-US alliance yagi tashi ajanga yimjung lidaktsütsü sayutsü aser South Korea kumzüka ayutsü atema combined defence posture tali tashi itdaktsütsü," ta Marine Corps Commander Kim Gye-

hwan-i ashi.

Tanen makai exercise agiba ajanga North Korea nungi nok-nü tali tendangtsü, koba US aser South Korea nati tsükchitep mapa inyakba temaitsü ama Pyongyang-i angateter.

North Korea indang nuclear sentong mechi United Nations Security Council pangzüng ajanga ballistic missile tendangba nokdanga lir.

Hwasong-17 ya North Korea indang missile tulutiba lir aser alima nung road-mobile, liquid-fuelled ICBM tulutiba alitsü. Iba missile nungya nuclear warhead inoker US nung tesem mashi ka tongtettsü südi ta amanger.

Iba ya taoba küm March ita mezüngbuba tendanga liasü, koba 2017 sülen North Korea indang ICBM mezüngbuba alitsü.

Office of the LONGSA MONGKA ILLANGTSÜR

H.Q. Longsa, Mokokchung: Nagaland

TENÜNGSANG AGÜTSÜR



Tenzüker taküm khuret tuluba agizüker aodang Tsüngremi maneni temoatsünung aniangma ta ozü illangtsür sarasadem.

Sd/-
Mokoktsüla
President
Longsa Mongka Illangtsür

Longsa Mongka illangtsür ajanga Lt. Bendangsüngba aser Mangyangtetla na jala Rev. Longrimongla Jamir, tenzüka wadang nung taküm mapang sempet tajungtiba agi Mangkolemba Baptist Arogo nung tesayula inyaka lia, tanelar wadang nung takok ngua 'Reverend' jenjang ngutetba asoshi tenüngsang tulu agatsür.

La teinyakdak Arogo aser ABAM Ordination Council danga pelaba lemsateper.

Sd/-
Bendanglemla
Secretary
Longsa Mongka Illangtsür

Assad-i Syria nung Russian sepaitem amenoktsü molunger

Moscow, Metsüremi/March 18 (Agencies): Syria Tir Bashar al-Assad-i, Russia nungeri mitkartem par linük nung amenoktsü asüngdangra pela agizüksü aser iba Middle East linük nung sepaitem timba kumdaktsütsü, ta ashiba ajanga yangji Moscow mitkar aliba teti atema akumtsü akok ta sayur.

Küm pezü longkak aita arur 2015 küm Syria nung rara tenzükdang Russia-ia shilem agia al-Assad busema liasü, anungji anüolen linük temi pa atsüngdoktsü takhangba agüjaka pa jenub.

Al-Assad-i Russia Tir Vladimir Putin den Kremlin nung Bodhbarnü ajurutepa liasü. Moscow-i Ukraine nung raraba pau bukuma liasü aser Russia indang state news agency RIA dang, Ukraine nung Kremlin-i kibur kuma jembiba litsü Damascus-i agizüker, ta ashi.

Russia-i military bases tasen amenoktsü aser Russian sepai timba kumdaktsütsü asüngdangra Syria-i pelashishia agizüksü aser itemji khet atema dangbo masütsüla, ta al-Assad-i ashi.

"Syria nung Russia nunger aliba ulushitsü ya tajung ka ama onoki bilemer. Linük mashi nung

Russian mitkar aliba ya khen atema kisüngbo masütsüla," ta al-Assad-i RIA dang ashiba Brestostibarnü osang kakat nung adoka liasü.

"Russia-i par sepai amenoka aliba ulushinüra mesüra sepai timba kumdaktsünüra, ibaji technical mesüra logistical ken o asütsü ta onoki amanger."

Al-Assad tir ka ama inyaka arudang 2011 nungi tenzüka rongrong agi sünger arur, kong mezüngbo yimjung nung longkak ait tenzüker saka telemsa tali adoka linük nung telemsa tali adok aser bendanger tembar aser tsükchirtem arua shilem agia liasü. Russia aser Iran teyari nung pai opposition ket nungi litsü tanaben agiogo saka linük asemprong ya rara mapang mapa tamajung inyakba linüktem lir, ta human rights groups temi aitsür.

Al-Assad bukuma Russia-i tayimtsü amshia amakba Hmeimim airbase den Syria nung Tartus naval facility ya Moscow kübok lir, koba Russia asoshi Mediterranean nungbo tzüyim sepaitem asoshi tamendak dak ibaji dang lir aser Soviet Union mapang nungi amshia arur.

(Maneni tapak 8 nung...)

<p>केनरा बैंक Canara Bank सिंडिकेट सिस्टम</p>		<p>POSSESSION NOTICE (For Immovable Property)</p>		<p>REGIONAL OFFICE, GUWAHATI 2nd Floor, Mayfair Building, Jotikuchi, Opp. Hanuman Mandir, Lokhra Road, Guwahati, PIN-781034, Assam</p>	
<p>Securitization and Reconstruction of Financial Assets and Enforcement of Security Interest Act, 2002, (Act 54 of 2002) kübok iba sangdong agütsür ya Canara Bank indang Authorized officer asünung Security Interest (Enforcement) Rules, 2002 indang Sec 13(12) kübok rule 3 nung tashi agüja aliba amshia Borrowers / Guarantors / Mortgagors dang sangdong nung shia aliba sen iba sangdong anguba anogo nungi anogo 60 tsüngta menoktsü Demand Notices agütsü. Iba account indang tejangja tsünglanglen agüja lir.</p>					
<p>Borrowers / Guarantors temi sen memonoktet nung sen apur aser nüburttem dang iba sangdong agütsüri shia aliba Act indang section 13(4) kübok Rules indang rule 8 & 9 nung tashi agüja aliba amshia tsünglanglen shia aliba ki o jen tsünglanglen shia aliba anogo nung agir.</p>					
<p>Nüburttem aser talisa Borrowers / Guarantors temi tsünglanglen shia aliba ki o jen atema mejembitsü tekumdangtsü meteldaktsür aser inyakshangshi lira itemji Canara Bank ajanga atetba jenjang nung tsünglanglen shia aliba sen aser interest dener agitsü.</p>					
<p>Iba rongsen agitsü asoshi mapang aliba atema Borrower dang Act indang Section 13 (8) reprangshimtsü meteldaktsür.</p>					
<p>A) Name of the Borrowers/ Guarantors / Mortgagors B) Branch Name</p>		<p>Liability As per Demand Notice Date</p>		<p>A) Date of Demand Notice B) Date of Possession</p>	
<p>(A) Sri Bendangangshi AO (B) DIMAPUR- II</p>		<p>Rs. 84,58,498.67 (Rupees eighty four lakhs fifty eight thousand four hundred ninety eight and sixty seven paise only) and interest thereon and cost.</p>		<p>A) 21.11.2022 B) 14.03.2023</p>	
<p>A plot of land and building with land measuring 0B-0K-18Ls covered by Dag No. 557/601 of Patta No.458 situated in the Nagarjan Block, Mouza-03 in the District-Dimapur, Nagaland standing in the name of Bendangangshi AO and bounded by: - Boundaries: North: Bendangsashi, South: Rev. Z. Yapang Aier, East: Mrs. Delhokrie, West: Approach Road.</p>					
<p>(A) Miss Lucky Ragui (B) DIMAPUR- II</p>		<p>Rs. 47,03,245.77 (Rupees forty seven lakhs three thousand two hundred forty five and seventy seven paise only) and interest thereon and cost.</p>		<p>A) 21.11.2022 B) 14.03.2023</p>	
<p>A plot of land measuring 01B-00K-14½ Ls covered by Dag No.- 88 of Patta No.128 situated at Wungram Colony, Purana Bazar under Mouza No.03, Block Purana Bazaar A.K. in the District-Dimapur, Nagaland standing in the name of Miss Lucky Ragui and bounded by: - Boundaries: North: Plot of Yarnao, South: Plot of Khanaoshang, East: Plot of Hopson, West: Plot of Ramyola</p>					
<p>Date: 14.03.2023, Place: Dimapur</p>				<p>Authorized Officer, CANARA BANK</p>	

Champions League quarterfinals fixture adokogo

Nyon, Metsüremi/March 17 (Agencies): Europe indang temaba club football tetoktepa Champions League quarterfinals nung tang iba tetoktepa takok marok bena aliba telok, Real Madrid aser Chelsea asayatsü aser Manchester City o Bayern Munich na asayatsü.

Napoli aser AC Milan asayatsü, koba telok anaprong Italy nungi lir, aser Inter Milan o Benfica asayatsü.

Champions League quarterfinals atema draw ya

Hokulbarnü Swiss nung aser 17 nung asayatsü. Final ya June 10 nü Istanbul, Turkey nung aliba Ataturk Olympic Stadium nung asayatsü. Chelsea aser Real Madrid na tan agi season asembuba atonga ajuruteper alitsü. 2020-21 season nung Chelsea aser Real Madrid ya semifinal nung ajurutepa Chelsea-i tsükdaktsü aser iba season takok marok nguteta liasü aser taoba season nung kasa club ana ya quarterfinals nung ajurutepa liasü, kong Real Madrid-i 5-4 aggregate nung tsükdaktsü.

Quarterfinal legs mezüngbuba ya April 11 aser 12 nung asayatsü aser return matches ya April 18 aser 19 nung asayatsü. Semifinal mezüngbuba nung AC Milan/Napoli v Benfica/Inter Milan aser tanabuba nung Real Madrid/Chelsea v Manchester City/Bayern Munich asayatsü.

Semifinal mezüngbuba ya May 9 aser 10 nung asayatsü aser return legs ya May 16

Indian Wells: Swiatek aser Alcaraz na semi-finals tongogo



Indian Wells, Metsüremi/March 17 (Agencies): World No 1 Iga Swiatek-i maneni Indian Wells titles akoktsü meranga asaya arur aser taküm iba tennis asayamung nung Romania tsür Sorana Cirstea madak straight sets nung takok nuga semi-finals tongogo.

Arishi küm 21 tain Swiatek-i 6-2, 6-3 agi World No 83 nung alila Cirstea madak takok ngua liasü.

Indian Wells defending champion Swiatek-i tang tashinung game ti tashi atonga takok ngua lir.

Teburtem asaya nung Carlos Alcaraz-i Felix Auger-Aliassime madak takok angu, shiba World Number 1 jenjangi tanaben shilangtsü meranger.

Rankings indang temaba jenjang nung alisang Novak Djokovic melentsü atema Spain nung top seed Carlos

Alcaraz-i pa asoshi mezüngbuba Indian Wells title ngutettsüla aser pai 6-4, 6-4 agi Felix tsükdaktsü.

"Tanü kü indang nükjidong ya asaya nung temolung agütsütsüba liasü. Ni maangka angutsü ta ni meteta liasü. Iba season nung match tajungtiba rongnung ka ni asayaogo. Ni kanga pelar aser maneni yamai asayaner."

Final atema Alcaraz-i Italy nung Jannik Sinner den asayatsü, shibai America nung defending champion Taylor Fritz madak 6-4, 4-6, 6-4 agi takok ngua liasü.

Tebur tarep asaya nung Britain nung Neal Skupski aser Dutcj nung Wesley Koolhof nati Jamie Murray aser Michael Venus madak 6-3, 6-3 agi takok ngua semi-finals tongogo.

Tenati Edouard Roger-

Vasselin aser Santiago Gonzalez na den semi-finals asayatsü, shirnoki Britain nung Lloyd Glasspool aser Harri Heliovaara na madak 2-6, 6-2 aser 10-7 agi takok ngua liasü.

Taoba küm French aser US Open akokla Swiatek-i Wimbledon champion Elena Rybakina den Hokulbarnü asayatsü.

Kazakhstan nung Rybakina, shibai quarter-finals nung Czech Republic tsür Karolina Muchova 7-6 (7-4), 2-6 aser 6-4 agi tsükdaktsü, lai January ita Australian Open nung Swiatek madak takok ngua liasü.

Tang tesayadak Indian Wells round pezü buba nung Britain tsür Emma Raducanu tsükdaktsüla Swiatek ya 1990 aser 1991 nung Martina Navratilova sülen iba asayamung takok atonga angur akumtsü meranger.

Asaya dang aka nung Greece tsür Maria Sakkari-i Petra Kvitova madak 4-6, 7-5, 6-1 agi takok ngua Indian Wells semi-final spot tanaben atonga ajangetogo.

Arishi küm 27 tain Maria Sakkari-i semi-finals nung Australian Open champion Aryna Sabalenka den asayatsü, shibai Bodhbarnü America tsür Coco Gauff madak 6-4, 6-0 agi takok ngua liasü.

Hockey India Awards 2022: Hardik Singh aser Savita Punia nati tematiba takok angu



New Delhi, Metsüremi/March 17 (Agencies): Hockey India pur pongu buba annual awards sentong Hokulbarnü linük yimtiba, New Delhi nung agia liasü, kong India nung tebur team vice-captain Hardik Singh aser tetsür team captain Savita Punia nati 2022 küm asoshi tematiba konang ajangeteta liasü.

Tenati pei category nung Balbir Singh Senior Award For Player of the Year sempet angu asen nisung shia sen lakh 25 agizük.

Asayar tejen Gurubux Singh nem Major Dhyhan Chand Lifetime Achievement Award for 2022 agüja liasü.

"Jangratemsü küm ka liasü, aser ni meranga inyakba ajitetba atema pela bilemer. Team ka ama tajung-tamajung ajanghiba küm ka liasü, aser asayar kari taküm kanga junga asayatet. Team ajunga tenung nung ni iba konang agizüker," ta Hardik-i iba sempet agizükba sülen ashi.

Savita-ia iba award anguba sülen pelaba lemsatep aser lar team nung külemi asayatem tushia liasü. "Ibai konang onsara tulu lir aser iba atema ni kanga

pelar. Team ka ama tajungtiba nung shilem agi aser FIH Women's Nations Cup akokba ya onok atema temelenshi aruba mapang ka liasü. Külem team nung asayatem, coach aser support staff temi tanen makai ajungshiba aser meranga inyakba atema ni pelaba lemsateper," ta lai ashi.

2021 küm takok angurtema iba sentong nung tushia liasü, kong Cabinet Minister of Law and Justice Kiren Rijiju, Minister of Sports, Minister of Agriculture & Farmers Welfare Narendra Tomar aser Youth Affairs and Minister of Information and Broadcasting Anurag Thakur nungertema dena liasü.

2021 küm atema tang India nung tebur hockey asayar captain Harmanpreet Singh-i Player of the Year Award angu aser Savita ya Women Player of the Year sangdonga liasü.

1956 Melbourne Olympics gold medal anguba Indian team nung züngsem alisang Amit Singh Bakshi nem 2021 atema Major Dhyhan Chand Lifetime Achievement Award agüja liasü.

Assad-i Syria nung Russian... (Tapak 7 nungi...)

Russia indang defence ministry ajanga January ita ashiba agi, Syria north tsütsü al-Jarrah military air base ya Russia aser Syria nati yanglushiogo aser linük anaprongi amshitsü. Aleppo anüdoklen iba tesem tilaka ya 2017 küm ISIL (ISIS) ket nungi rakzüka liasü.

Moscow nung al-Assad-i Putin dang taoba ita menoknok tesashi anokba sülen Russia-i teyari agütsüba atema pelar, ta shia liasü.

Ukraine indang ken o nung Syria ya Russia den nokdaka lir, ta al-Assad-i ashi.

"Ukraine nung special military operation tenzüker tang mezüngbuba semdang asünung, iba special operation nung Syria nungeri busema nokdakba nenshia ashir," ta al-Assad-i Putin dang ashi.

Ukraine nung Russia nungeri rakzüka litsü-lika tem Russia nung indang ama Syria-i agizüker, ta pai ashi.

"Item ya Russia nung litsü ta ni ashir aser rara ya metenzük ka asüyonga item ya akhi mapang nungi Russia nung litsü lir," ta pai ashi.

Russia nungeri Ukraine shilem pongu shi par indang ta ashir aser tangbo item litsü-lika ya Russia indang ta ashir.

Ukraine nungi Russian sepai tatemsaba maridok tashi raratsü, ta Ukraine-i ashir. Ukraine nung litsü rakzüka ya ozüng agi memelar ta anüolen linük temi ashir.

Hopta ishika tsüngta Russia aser Syria tsüngta rongsenketzüng tesendaktep tsütsü tezüngzüktep kar agitsü, ta al-Assad-isa ashi.



Lanurtem saisapong nung temolung agütsütsü asoshi ajungmesotsü nükjidong nung 78 Bn CRPF, Zubza ajanga Kiruphema yimsüng nung lanurtem nem Table Tennis board den tennis bat aser ball alija liasü. Item oset ya March 17, 2023 nü Civic Action Programme ka ayongzüka Kiruphema Youth Organization nem amokja liasü.

BILEMDANGANG

"Yin tajungtiba yanglutsü asoshi mi tatsüktiba nung molur."